

1619

11. Febr. 17 12

LETTRE

DE CLEOPHON

A POLEMANDRE, 33

SVR LES AFFAIRES DE CE  
temps.


AVEC VN ADVERTISSEMENT  
AVX LECTEURS.



A PARIS,

M. DC. XIX.

THE NEWBERRY  
LIBRARY



Le Sieur E. M. N. G. Amy de l'Authheur.

AVX LECTEURS.

Case  
F  
39  
326



1619  
L y a quelque deux mois que le Gentil-homme qui est appelé Polemandre en ceste lettre, .escriuit de Languedoc à son frere Cleophon, que les gës de bien de ces quartiers-là estoïent en de grâdes apprehensions que ce Royaume ne fust agité de nouueaux troubles, & que le corps de la Religion pretendue, ne se ioignist à la cause du Bearn, & ne portast les choses iusques à l'extrémité. Cleophon qui estoit en lieu où il pouuoit estre mieux informé de la Verité des affaires, essaya de le guerir de ceste erreur par ceste responce, & luy fit vne libre & Veritable description de l'Estat present de la France, & de tout le party huguenot, afin que sur cela, il peust faire vn iugement de ce qui deuoit arriuer. Le Courrier qui portoit la lettre la perdit fortuitement sur le chemin de Lyon, mais la bonne fortune permit qu'elle tombast entre les mains d'un Seigneur de qualité, qui l'estima tellement qu'il en fit faire plusieurs coppies. Et bien que le vray nom del' Authheur n'y fust pas, si est-ce

qu'on le recognut incontinent à son stile, comme on  
 recognoit quelquesfois les enfans à la ressemblan-  
 ce de leurs peres; sur ces entrefaites ie l'allay trou-  
 uer pour le prier de permettre qu'on l'imprimast,  
 mais il ne fut pas en ma puissance de le pouuoir ob-  
 tenir de sa modestie; à la fin comme ie luy en eus fait  
 voir plusieurs exemplaires miserablement depra-  
 uez, il se laissa vaincre à ma priere pour la crainte  
 qu'il eust que sa reputation n'y fut engagee, &  
 qu'il ne fut comme garant des fautes d'autrui. Je  
 t'ay voulu rendre ce bon office. Lecteur, & afin  
 que tu sçaches en quel pays tu vas entrer, ie t'en  
 ay fait come vne carthe au sommaire que i'ay mis  
 au feuillet suiuant, tu verras par ce moyen avec quel  
 ordre l'Auteur a procedé pour traicter ceste ma-  
 tiere, & possible aduouëras tu m'en deuoir quelque  
 sorte d'obligation, Adieu.





4  
LETTRE  
DE CLEOPHON A  
POLEMANDRE.

---

S O M M A I R E.

1. Que Polemandre n'a point de subiect de craindre la guerre civile.
2. Que les peuples ne sont point disposez à se reuolter.
3. Qu'un party ne peut estre fort sans auoir un pretexte specieux.
4. Qu'on n'en peut prendre sur la personne du Roy.
5. Qu'on n'en peut trouuer au gouuernement.
6. Que ceux de la Religion pretendue n'en peuuent fonder sur la persecution.
7. Qu'outre qu'ils sont diuisez par la doctrine, par les intentions & par les places, ils n'ont point de chef, ny esperance d'en auoir.
8. Que le faict de Bearn n'a rien de commun avec l'interest du corps de la Religion.



ous auez grād tort, mon cher polemadre, de vous effrayer sur vn faux bruit qu'on fait courir que ceux de la Religion prennent les armes, & que le pays de Bearn s'est reuolté; vos apprehensions témoignent bien que vous ignorez quelle est la puissāce du Roy & la foiblesse de ses ennemis. Certes à voir vos lettres, il se-

ble que la France est desia perduë, & que la guerre y  
 soit allumée de toutes parts: Quelle occasion auez-  
 vous de cōcevoir ceste mauuaise creance de nos af-  
 faires? Vous souuenez-vous plus qu'il n'est pas per-  
 mis de iuger sinistrement de la fortune del'Estat, &  
 quemesmes les songes funestes sur lesquels on pou-  
 uoir faire vn mauuais augure du Prince, ont autre-  
 fois esté punis cōme des crimes capitaux? D'où viē-  
 que vous n'estes plus vous mesmes, & qu'est deue-  
 nuë ceste constance qui desfioit toute sorte d'acci-  
 dents? O qu'il y a difference entre les paroles &  
 les effects: & que la pluspart des hommes sont vail-  
 lans quand ils ne voyent point le visage de leurs en-  
 nemis: La frayeur vous fait desia passer & trembler,  
 comme si vous estiez à deux doigts pres du naufra-  
 ge, & que ne plus ne moins qu'en vne mer sans fōds  
 & sans riuē, vous n'eussiez à l'entour de vous que  
 des vagues & des rochers. Ie sçay bien que les cau-  
 ses des grādes craintes cōme la vostre sont quelques  
 fois si iustes & si visibiles, que c'est estre judicieux que  
 d'estre timide, mais ie ne voy point encore d'esclairs  
 & n'entends ny vent ny tonnerre qui me facēt croi-  
 re que la France soit agitée de la tourmēte que vous  
 vous imaginez. Le vaisseau dans lequel nos fortunes  
 & nos vies sont enfermées est si prudemment gou-  
 verné, & toutes choses tellement disposées à fauo-  
 riser nos desirs, que de quelque part que ie puisse  
 ietter les yeux, ie n'apperçoy que des matieres de  
 ioye & des esperances de salut. Vous vous estonnez  
 de ce qu'en vn petit quartier d'vn grand Royaume,  
 comme la France, il y ait des hommes qui obeissent  
 laschement, combien au contraire auriez vous plus  
 de subiect de vous esmerveiller, si entre des peuples

si differents de religion & d'humeurs, il se trouuoit vne si parfaicte harmonie que iamais il n'y eust de faux accords? A peine vne petite famille se peut maintenir sans quelque diuorce, & vous trouuez estrange qu'en vn Estat composé de tant de milliōs d'hommes, il y ait quelquesfois des murmures & des mescontentemens? Cest vn malheur comme attaché fatalement à la condition des Monarchies, elles sont comme ces grands edifices, il y a tousiours quelque piece qui pousse hors de son alignement. La France a souuent esté sans tempeste, mais on ne l'a iamais veüe sans quelque sorte d'agitations. Quant à l'affaire de Bearn elle se passera plus doucement qu'on ne s' imagine, & afin que vous cognoissiez le poinct où les choses doiuent tomber selon les raisons humaines, ie vous veux monstrier que ceux qui voudroient troubler le repos public, n'ont *ny pretexte ny forces* pour entreprendre vne guerre, & que le faict de Bearn est particulier; tant s'en faut qu'il touche le corps de la religion. Souuenez vous donc de ces deux poincts, parce qu'ils sont comme le fondement de mon discours.

2. Polemandre, c'est vne maxime qu'une des premieres pieces d'un party qui veut faire de grands & extraordinaires souleuemens, est d'auoir quelque pretexte specieux; autrement il se ruine de luy mesme & ne peut faire de progres. Outre ceste consideration, il faut que les peuples soient disposez à se reuolter. Ce sont les pretextes qui les eschauffent & qui les mettent en des frenaisies qu'on ne guerit pas aisément. Combien la France deceuë par l'apparence d'une sainte ligue, a-t'elle esté de temps auparavant qu'elle recogneust qu'on l'abusoit, & com-



bien a-t'elle receu de coups de la main de Dieu, de-  
 uant qu'elle ayt peu comprédre que ceux en faueur  
 desquels elle se rebelloit contre ses Roys, n'auoient  
 autre dessein que d'vsurper sa liberté sous pretexte  
 dela defendre. Ils ne taschoient de ruiner l'autho-  
 rité Royale que pour s'en emparer eux-mesmes, &  
 la religion ne seruoit que de couuerture aux passios  
 de leurs interests particuliers. Ce nous est tousiours  
 vn grád bien de ce qu'il reste encore vne infinité de  
 personnes qui se ressouuiennent des miseres qu'el-  
 les ont souffertes, pour chastimét de leurs reuoltes.  
 Il n'y a sagesse si ferme que celle que nous acquerôs  
 à nos despens, & tous les preceptes du monde ne  
 nous rendent point si sçauants en la sciéce de viure,  
 que l'experience des maux qui nous sont arriuez par  
 nostre faute. On a peu voir aux derniers mouuemés  
 de ce Royaume le profit que nous auons fait de nos  
 propres afflictions. Les villes n'ont point voulu adhe-  
 rer à la faction qui se fit contre le Roy; encores si  
 peu d'hommes qui se ietterent du costé des Princes,  
 ne le firent point tant par affection de leur seruice,  
 que par haine du gouuernement. Lors que le Chef  
 de ce party fut arresté dans le Louure, le peuple de  
 Paris en receut aussi peu d'émotion, que si cet ac-  
 cident fust arriué à quelque particulier. Quel effort  
 ne fit-on point pour faire prendre les armes aux  
 Parisiens? Les artifices qui peuuent esmouuoir à la  
 sedition, à la colere, & à la pitié, y furent tous em-  
 ployez, & toutesfois il n'y eut plaintes, larmes, ny  
 prieres, capables de les porter à rien faire cōtre leur  
 deuoir. Cepédant vous m'aduouierez, Polemandre,  
 que si iamais il y eut saison où ce peuple deust avec  
 apparence faire quelque traict de legereté, ce fut en

ceste occasion. Toutes les circōstances de temps me portent à ce iugement. La creance generale estoit qu'on ne s'estoit saisy de la personne de Monsieur le Prince, que pour asseurer la fortune d'un estranger. Presque tous ceux qui pouuoient donner reputation aux affaires du Roy estoient proscribeds. La persecution estoit allumée contre tous les gens de bien. Le Duc de Montbazon qui n'eut iamais autre object deuant les yeux que le seruice du Roy, experimenta combien la fidelité desplaisoit à ceux qui regnoient; estre vertueux, c'estoit estre criminel, les richesses & les dignitez estoient des subiects d'exil, cōme les inimitiez particulieres, les delateurs, engeances nées pour la ruine publique, obtenoient des recompēses non moins odieuses que leurs calomnies, le gouuernement estoit descricé; bref la condition du temps paroissoit du tout fauorable au premier qui eust voulu prédre quelque pretexte, & le Prince de Condé sembloit estre seul en aage & en qualité de le pouuoir faire; & toutesfois quelque grand que fust le desordre, il n'y eut homme de si peu de sens, qui ne preferast l'incommodité d'une miserable paix, à l'incertitude de remettre toutes choses en leur premier estat, par la voix de la violence. Graces à Dieu, nous sommes si doucement gouvernez qu'il n'y a que les meschans qui accusent ce regne d'estre malheureux. D'esperer doncques de trouuer les esprits enclins à se rebeller, ie n'y voy point d'apparence. Voyons si les ennemis de la paix peuuent prendre quelque pretexte pour les esmouuoir.

3. Ceux qui n'approuuent que ces regnes où les foiblesses de l'autorité Royale rendent leurs tyrannies absolues, recognoissans combien la reputation est



est necessaire à maintenir les plus puissantes monarchies n'ont peu trouuer vn plus cōmode moyen de troubler le repos public, que de crier le gouuernement del'Estat, afin de donner aux peuples vn dégoust du regne present. C'est par ceste ruse que les Roys sont plus offensez que par la force de leurs ennemis. La guerre esclatte avec tant de bruit, & vient avec de si grāds & si effroyables preparatifs, qu'il est mal-aisé qu'on en soit surpris. Au contraire, la calomnie vient sourdement, & parce qu'elle n'a pas tant d'appareil, aussi ne dōne-t'elle pas tant de peur. De sorte que le peu de soin qu'on a d'empescher de bonne heure la mauuaise opinion qu'elle peut imprimer dans les esprits, luy donne moyen de faire vn progres qui ne trouue point d'obstacles: de là vient qu'ordinairement les Roys se trouuent ruinez deuant qu'ils croient que la fortune puisse rien contre leur grandeur. I'admire quelquefois en moy-mesme, mon cher Polemādre, combien est fragile le moyen par lequel l'autorité Royale se maintient, considerez-là comme vous voudrez, elle n'est fondée que sur le bon iugemēt qu'on fait du Prince, depuis que ceste creance est perduē, il ne faut plus qu'il espere de trouuer d'obeissance ny de respect. L'amour qu'il luy portoit auparauant se perd incontinent apres l'estime, & la crainte ne dure gueres apres l'amour: ses actiōs quelques iustes qu'elles soient sont tousiours mal interpretées. Veut-il faire quelque chose d'autorité absoluē, les peuples croient que c'est tyrannie, y procede-t'il par la douceur, ils s'imaginent que c'est l'ascheté, & à la fin on vient du mespris de sa personne iusques à la liberté de l'offenser. Il n'y a de uoir que les hommes rendent plus à contre-cœur,

que l'obeissance qu'exige d'eux vn Prince qu'ils croient indigne de leur commander, & comme les femmes qui defestiment leurs maris, prestēt aisémēt l'oreille aux sollicitatiōs des adulteres. Ainsi la mauuaise opinion que les subjects ont de leur Roy, les dispose incontinent à se laisser emporter à tout ce que l'ambition d'vn vsurpateur peut désirer d'eux. La licence des libelles diffamatoires que les ennemis de Henry III. firent courir pour le décrier, luy fit plus de mal que n'eust fait la perte de trois batailles. Cependant l'enuie mesme, ne peut nier qu'il n'eust presque toutes les parties d'vn graue Roy, Il estoit vaillant & liberal autant que Prince l'ait iamais esté, outre qu'il donnoit beaucoup, il donnoit de bonne grace. Son naturel n'auoit rien que de magnifique & de Royal, l'experience ne luy manquoit point. Sa mere qui n'eut iamais autre but que de se rendre nécessaire parmy les diuisions de ses enfans, l'auoit nourry de bōne heure dans les affaires, pour l'opposer à la grandeur de son fils Charles IX. La fortune auoit fait gagner des victoires à ce Prince dès l'aage de dixsept & dixhuiet ans, la nature mesme luy auoit donné toutes les parties qui sont nécessaires pour regner avec Majesté. Neantmoins, la calomnie fut si puissante, que sans que ses ennemis eussent tiré l'espee contre luy, il se veit comme vaincu dans son Royaume, & se trouua presque sans subjects au milieu de tous ses subjects. Ceux qui veulent ietter dans vn Estat les semences d'vne grāde rebellion taschent tousiours d'imprimer vne mauuaise creance du Prince. Ces artifices ont quelquesfois succédé d'autant plus heureusement à ceux qui les ont pratiquez, que les peuples qui resident dans les

Prouinces ont peu de moyens d'estre informez de la verité: joinct qu'estás d'une humeur ordinairement changeante, ils sont quelquesfois si ennemis de leur propre bien, qu'ils prefereront à la certitude d'estre heureux sous vn bon Roy, l'asseurance d'estre miserable sous vn Tyran, tant est puissante sur les esprits des hommes, ceste folle imagination, qu'il n'est point de si bons maistres que ceux qui ne leur ont jamais commandé. Or est-ce vne grande consolation aux gens de bien, de ce que nous auons vn si digne Roy, que ceux de la Religion, ny autre quels qu'ils soient, ne peuuent blasmer ny la personne de sa Majesté ny le gouuernement du Royaume, ny se plaindre d'aucunes persecutions, communs pretextes des troubles de cet Estat. C'est ce que i'ay resolu de vous faire voir. Je commenceray donc par la personne du Roy comme par la plus digne partie de la matiere dont ie veux traicter. Et bien que la vie des grands Princes commeluy, ait tant de tefmoins qu'elle ne puisse estre ignoree; ie croy toutesfois que vous aurez du contentement d'en voir vn crayon tiré de ma main.

4. Je nem'estonne point, mon cher Polemandre, si plusieurs personnes qu'on a creües diuinement inspirees, ont annoncé des merueilles de nostre Roy. Tous ceux qui le voyent particulièrement y recognoissent desia des marques de ces heureuses predictions. Il me ressouient sur ce propos que Monsieur le Garde des Seaux, estant vn iour reuenu du Louure avec vn extreme contentement de quelque belle action que sa Majesté venoit de faire en plein Conseil, dit par deux fois en parlant du Roy, veritablement ce Prince a ie ne sçay quoy de diuin. Ce



Pour mesme i'allay voir M. le President Iean nin qui  
 m'en dit autant. Souuent ie me suis traouillé l'esprit  
 à me représenter tout ce qui peut rendre vn Monar-  
 que entierement accompli, mais ie confessé que  
 mon imagination ne s'est peu rien figurer de grand  
 au delà des vertus du Roy. Il a tant de parties Roya-  
 les, que quand ceste couronne ne luy seroit point  
 acquise par naissance, elle luy seroit deuë par ele-  
 ction. La sagesse que les autres Princes ne peuuent  
 auoir que par vne longue suite d'experience & de  
 traiaux, luy est venue deuant les anneés, nous en  
 voyons tous les iours tant de tesmoignages que si  
 iusques à present nous auions creu que les Monar-  
 ques fussent faicts par la fortune, nous serions for-  
 cez d'aduouer que le nostre nous est donné de la  
 main de Dieu. Considérez ie vous prie de quelle  
 façon vrayement miraculeuse il a surmonté tous les  
 obstacles qu'on a tasché d'opposer à l'accroissement  
 de sa vertu: voyez avec quelle patience il supporte  
 ses desplaisirs, avec quelle discretion il les dissimule.  
 Souuenez-vous de quel courage il se resolut de pré-  
 dre le gouuernement de son Estat, & comme il a soin  
 de la iustice en vn aage où les ieunes Princes n'ont  
 soin que de leurs plaisirs, vous iugerez, ie m'asseu-  
 re, que c'est vn ouurage de la prouidence diuine, &  
 croirez qu'elle se veut seruir de luy à quelque dessein  
 parfaitement glorieux. L'obligation que toute la  
 France luy doit pour ceste grace inestimable excède  
 toutes les autres que nous luy deuons d'ailleurs. Car  
 quelle plus grande & plus signalée faueur nous pou-  
 uoit faire sa bonté, que de nous donner vn Prince,  
 tout bon, tout iuste, tout chaste, tout pieux? Comme  
 il arriue rarement que le Ciel face des biens si purs

qu'ils ne soient meslez avec quelques maux, de mesmes nos Roys ont eu peu de bonnes qualitez. que la proximité de vices n'ait alterées : l'un a esté aduisé en ses affaires mais ses conseils aboutissoient tousiours à la tromperie comme à leur dernière fin : Vn autre a esté courageux, mais il estoit plus dans la temerité que dans la vaillance : vn autre a esté eloqué, Majestueux, & quand la necessité le requeroit, infatigable dans les trauaux de la guerre, mais il s'est perdu dans les delices de la Paix. Les vertus du Roy ont ce priuilege particulier, qu'elles n'ont aucune affinité avecques les vices qui les accompagnent ordinairement. Il a vn zele sans superstition, yne clemence sans lascheté : son humeur graue ne repugne point à sa modestie, & sa douceur ne deroge point à sa Majesté. Il ne faut rien craindre de mauuais des Princes qui craignent Dieu, qui ne le sçait pas bien seruir ne sçauroit bien commander. Le Roy commence & finit la iournee par l'inuocation de son nom, c'est la dernière parole qu'il prononce quand il se couche, & la première qu'il dit aussi tost qu'il est esueillé. Il se tient si glorieux de porter la qualité de premier Fils del'Eglise, qu'il n'y a bien qu'il ne face pour la meriter. Il ne se passe iour qu'il n'oye la Messe, feste solemnelle qu'il ne communie, premier Dimanche du mois qu'il ne se confesse, soir qu'il nexamine sa conscience. Et bien que toutes ces bonnes actions deussent estre publiques pour estre exemplaires, il a neantmoins certaines deuotions particulieres qui n'ont autre tesmoins apres Dieu, que deux ou trois de ses confidens. Le Cabinet merite plustost d'estre mis au nombre des Temples, que des lieux prophanes.

La Contr est toute religieuse; le vice n'y a point d'accez, les paroles deshonestes en sont bannies, & la hayne que le Prince porte au mal a pris la discretion & le respect aux langues les plus déreglées. Il a vn si grand zele au salut de ceux qui sont hors de l'Eglise, qu'il est plus content de la conuersion d'vn heretique, qu'il ne seroit de la desfaite d'vn ennemy. Vous ne sçauriez distinguer par ses caresses ceux qui sont de diuerse religion: mais comme vne heure après que son Pere Henry le Grand auoit gagné quelque victoire signalee, on voyoit en sa Cour les vaincus avec les vainqueurs, on voit semblablement pres de son fils les Catholiques & les huguenots traittez avec égale faueur. Outre que son Ame est naturellement portee à la pieté, les saintes & continuelles exhortations de son Confesseur l'y fortifient grandement. C'est vn homme auquel ie ne sçay que ie doy le plus loüer, ou la bonne vie, ou la profonde erudition. Il n'y a rien de plus simple que ses mœurs, rien de plus feruent que sa charité. Il est tellement passionné pour tout ce qui touche la gloire de Dieu, que ses paroles sont autant de fleches ardantes, qui penetrent les cœurs les plus endurcis. Je n'ay iamais ouy predication de luy, qui ne m'ait rendu plus homme de bien & plus sçauant. Vous sçauiez, mon cher Polemandre, comme la contagion de l'heresie a longuemēt infecté nostre maison, & combien i'ay autresfois abhorré les Iesuites: dés ma plus tendre ieu nesse on m'auoit appris à les auoir en horreur, comme les Romains nourrissoient leurs fils en la hayne des Carthaginois, mais en fin la verité plus forte que l'imposture, m'a contrainct d'honorer leur Compagnie comme vn seminaire des plus



vaillants Athlettes qui combattent aujourd'huy  
 pour la defense de la foy. Puis que nous sommes  
 sur ceste matiere, il ne sera point hors de propos que  
 ie vous escriue trois choses fort remarquables que  
 le Pere Arnoux a publiquement preschees en la pre-  
 sence du Roy. La premiere concerne l'independan-  
 ce des Couronnes. Il dit haut & clair qu'elles ne re-  
 leuoient que de Dieu, & que c'est heresie que de le  
 croire autrement. La seconde regarde la seureté de  
 la vie des Rois, leurs personnes, dit-il, sont tellement  
 inuiolables, qu'il n'est iamais permis d'y attenter,  
 pour quelque cause que ce soit, & tout Chrestien  
 doit crier avec le Concile de Constance, *Malediction*  
*eternelle à quiconque assassine les Rois, Malediction eter-*  
*nelle à quiconque tue les Rois.* Le troisieme point tou-  
 che les moyens dont les Princes Chrestiens se doi-  
 uent seruir pour l'establissement de la Foy, il dit que  
 la seule voye agreable à Dieu pour extirper les here-  
 sies, est d'auoir de bons Pasteurs, & que iamais les re-  
 medes violents n'auoient prosperé. Le feu Roy fut si  
 repentant de n'auoir pas esté assez exact au choix des  
 Prelats, qu'il dit vn iour deuant plusieurs Princes  
 & Seigneurs, *les Euesques sont les Prestres, mais le Car-*  
*dinal du Perron fera les Euesques.* Si le Roy continué en  
 la resolution qu'il a prise, de ne conferer les benefi-  
 ces qu'à des personnes capables, on n'a que faire de  
 craindre que l'erreur subsiste long temps. Il a desia  
 heureusement commencé par le digne successeur  
 qu'il a donné à ceste incomparable lumiere del'Egli-  
 se, en la qualité de grãd Aumosnier de France. Ceste  
 dignité est tellement importante, que le Roy a passé  
 par dessus toute sorte de consideration particuliere  
 pour donner ceste charge à vn Prelat qui est de vie

exemplaire, & qui ne pensoit à rien moins qu'à cét honneur. Il ne faut pas demander si le Prince qui a les vertus Chrestiennes en tel degré de perfection, sçait pratiquer les vertus morales. Je ne vous puis représenter la tempérance dont il use dans les honnestes plaisirs, car il n'en cognoit point d'autres. Qu'il soit dans ses exercices, il n'y a rien qu'il ne laisse sans regret pour s'enfermer deux ou trois heures dans le Conseil avec les Ministres de l'Estat. Quand les Rois ont des inclinations basses on le recognoist aisément: Ils pensent estre à la geine quand ils sont dessus le trône: luy tout au contraire ne paroist iamaïs si content que quand il faut donner audience à des Ambassadeurs, ou faire quelques autres actiōs de Roy. Son esprit, qui se plaist dans les choses serieuses, s'est despoüillé des affectiōs de la ieunesse pour prendre les soings de l'age viril, & pour s'appliquer du tout au labeur du gōuvernement. Il n'y a particularité dans les affaires, dont il ne soit informé: Il reçoit toutes les instructiōs des Ambassadeurs, & n'espedie aucun que par son commandement. Si on luy demande quelque recompense, il delibere auant que d'engager sa parole, mais elle est inuiolable depuis qu'elle est vne fois donnee. Je ne fais point estat des profusions que fait vne main qui respand au lieu de verser: les faueurs qui se font sans iugement, se recoiuent aussi sans obligation. J'aimerois mieux estre estimé par Auguste, que comblé de richesses par Caligula. La mesme consideration qui apprend au Roy l'art de bien employer ses bien-faits, luy fait recognoistre les personnes qui meritent d'estre aimees. On ne sçauoit dire que iamaïs homme vicieux ait eu part en ses bonnes graces. Je tiens quant à moy qu'il

qu'il n'y a rien de plus important à l'honneur d'un grand Monarque comme luy, que le choix des fauoris. De là dépend la bonne & mauuaise opinion ou sont les Rois. Que les autres hommes se proposent tant qu'ils voudrôt l'vtilité particuliere en leurs amitez, le public n'y a pas grād interest : mais il faut que les Princes facent tout pour la reputation. Celuy qui tient la premiere place en la bien veillance de sa Majesté, est tellement vertueux, que le Roy s'est acquis la gloire d'auoir mis son affection au plus digne subiect qui soit au monde. Ce qui a fait murmurer toute la terre cōtre vne partie des Césars, estoit que leur faueur esleuoit des gens de neant aux plus eminentes dignitez de l'Empire, seulement pource qu'ils estoient meschans. Je sçay bien qu'il n'appartient point aux subiects de vouloir sçauoir pourquoy leurs Maistres aggrandissent vne creature par dessus les autres, Dieu a donné aux Souuerains l'autorité de commander, & a reserué aux peuples l'honneur d'obeyr : mais quelque silence que ces raisons leur imposent, elles ne sont pas assez puissantes, pour les empescher de comparer les fortunes des grād avec leurs merites, & de dire leur aduis de la conuenance ou de la disproportion qu'ils y treuent. Monsieur de Luynes que ie ne cognois, ny par iniure ny par bien fait & que i'en aye receu, a quant à ce poinct vn merueilleux auantage. Tous ceux qui l'ont particulieremēt pratiqué, ont vne si grande opinion de luy qu'ils croyent qu'il n'y a charge si releuee qui ne soit au dessous de ce que meritēt les vertus, & ceste grāde passion qu'il a pour la personne du Roy, pour la Religion & pour l'Estat. Il a vn esprit fort & solide : sa franchise qui est ouuerte à tout le monde, est mes-



mement peinte sur son visage, ses intentions ne tendent qu'au bien, & personne ne ressent les effets de son pouuoir que par les fruiçts de son amitié. Je ne vous diray rien de ses freres, sinon que leurs bonnes inclinations sont si conformes aux siennes, qu'il semble que leurs trois corps ne soient animez que d'un seul esprit.

Je ferois iniure aux vertus du Roy, si ie taisois cōbien il excelle en la Iustice politique, partie d'autant plus rare & plus estimable, que les vertus morales ne regardent que le gouuernemēt de soy mesme, & que celle-cy a pour son obiect le gouuernement public. Tybere eut autresfois raison de dire que les Princes estoient plus obligez que les autres hommes à faire de belles actions, la verité de ces paroles se peut remarquer principalement en la distribution de la Iustice politique, elle a des considerations qui combattent bien souuent les sentimens de la nature & les raisons de la Iustice qui se rendent par le Magistrat. Iamais peuples ne l'obseruent si exactement que les Romains: Lors qu'une legion auoit fait quelque infigne lacheté, la loy de la discipline militaire vouloit que sans acception aucune des bons & des mauuais soldats, la dixiesme partie de cinq ou six mille hommes, tant du plus que du moins mourut deffous le baston, & le malheur du sort tomboit aussi bien sur les vaillans que sur les couiards. Pareillement, si vn maistre se treuuoit tué, & que le meurtrier fust incognu, tous les esclaués residents en la maison où s'estoit commis l'assassinat, estoient appliquez à la torture, & quelquefois de cinq ou six cents il ne s'en treuuoit pas vn qui fut coupable. La loy qui s'est tousiours desiee des esprits seruiles, & qui les a

creus capables de faire toute sorte de mal pour auoir  
 le bien de la liberté, n'a peu trouuer vne meilleure  
 inuention pour les obliger à auoir soin de la vie des  
 maistres, que de manacer tous les esclaués indiffe-  
 remment de ceste rigueur: mesmes en matiere de  
 grandes conspirations: le Prince pardonnera quel-  
 quesfois à vne partie des complices, & fera punir les  
 autres, cela semble iniuste, ie le confesse: parce que  
 les peines doiuent auoir leur proportion avecques  
 les crimes, & qu'il semble qu'on passe les regles de  
 cette mesure, en ce que ceux qui sont également cri-  
 minels ne sont pas également punis. Mais les Prin-  
 ces ont des considerations qui ne laissent pas d'estre  
 iustes, pour n'estre pas semblables aux nostres, &  
 tout grand exemple a ie ne sçay quoy d'inique, qui  
 se rpare par l'vtilité que le public en reçoit. Il n'y a  
 rien de si difficile au monde que de treuuer l'indu-  
 strie de faire ployer & roidir cette iustice bien à pro-  
 pos. C'est en quoy la Majesté merite veritablement  
 d'estre admiree. Mōsieur le Chancelier a dit souuent  
 à ses plus familiers amis, que iamais il ne luy a yeu  
 dire dans le Conseil vne parole qui ne fust digne  
 d'un grand Prince: il ne faut point alleguer au Roy  
 l'interest particulier quand il y va du bien public.  
 Tout le monde sçait combien a esté pernicieux à la  
 France le droit annuel. A peine fut-il introduict,  
 que le feu Roy recogneut quelle grande playe il  
 auoit faicte à son Estat. Les simples cōmissions d'un  
 an rendent les hommes insolents, comment ne de-  
 uiendroient-ils insupportables quand les offices  
 sont hereditaires en leurs maisons: ô que ceste loy  
 estoit admirable, qui vouloit que les Consuls après  
 auoir commandé vn an à tout le monde, vinsent

rendre conte de leurs charges comme personnes priuees. Je ne m'estonne point si Tacite parlant d'une proposition qui fut faicte à Tybere de prolonger pour six ans les gouuernemens des Prouinces, qui regulierement ne duroient que douze mois, dit que ceste ouuerture passoit bien plus auant qu'il sēbloit, & qu'on vouloit penetrer dans les secrets de l'Empire. Les Gouverneurs estoient si peu de temps dans leurs charges qu'ils n'auoient pas le loisir de s'autoriser. Dés lors que les cōmissions ont esté erigees en tiltre d'offices, il n'a plus esté en la puissance des Roys de recompenser les gens de bien, ny de punir les meschans, n'y ayant rien de si difficile que de faire le procez à vn Magistrat perpetuel. Depuis l'introduction du droit annuel, le commerce a esté entierement ruiné, la vanité du siecle auoit fait monter à vn si haut prix l'estimation des charges, que la Noblesse estoit exclue de l'esperance d'y paruenir si peu d'ordre qui restoit en ce Royaume a esté renuersé par ceste corruption, le secours des loix estant inutile, & leur puissance violee par les brigues, par les factions & par l'argent. De tant de beaux reglemens de la iustice & des finances, les vns sont aneantis par le temps, & ce qui est encoré plus à deplorer, les autres sont abolis par mespris. Bref on a veu depuis ce temps-là en ceste Monarchie tous les signes d'un Estat qui déperit, car quelle plus grande marque de la decadence d'un Empire que quand les dignitez y sont vendues aux plus riches, au lieu d'estre donnees aux plus vertueux. Le Roy ayant doncques recogneu la cōsequence de cet abus dont le mal croissoit de iour en iour, se resolut d'y remedier. On auoit desia vescu si longuement dans ceste



confusion qu'on n'y pouuoit mettre vn meilleur ordre, sans incommoder vn grand nombre de bonnes familles du Royaume. Mais sa Majesté considerant qu'il est impossible de faire vne grande reformation sans que quelques-vns y soient preiudiciez, prefera courageusement le salut public à toute autre sorte de considerations, & supprima le droict annuel. Auec quelle resolution s'est-il comporté en la defense des duels? Il y auoit pres d'un siecle entier que ceste fureur dominoit sur les courages de la Noblesse Françoise, l'erreur & l'impiété du temps auoit mis le poinct d'honneur en ceste brutalité; les vains efforts que les feu Roys auoient faits pour estouffer ce monstre prodigieux, faisoit croire à tout le monde que c'estoit vn mal sans remede: de sorte que plusieurs estoient d'aduis qu'il valoit mieux tolerer les vices enracinez de longue main, que de montrer la foiblesse de l'autorité Royale, en faisant des Edicts qui seroient incontinent violez. Toutes ces difficultez n'ont peu empescher le Roy d'oster de nostre nation ceste barbare coustume, la seuerité de son Edict a fait vne telle peur aux plus hardis, que nul n'a encore eu l'audace d'y contreuenir ouuertement. Si nos Roys ne sont obeïs, il ne tient qu'à eux (Mon cher Polemandre) l'vnique moyen de regner absolument c'est de regner iustement, qu'ils ostent aux hommes l'esperance d'obtenir des graces, ils leur osteront la hardiesse de faire des crimes: les François ne sont point si peu capables de discipline que l'on croit. Il n'y a rien que les loix ne leur fassent faire, pourueu qu'elles ayent la verge à la main. Outre que le Roy est fort seuer à faire obseruer ses Edicts, il a vne grande clemence naturelle, & sçait vser bien à

propos de la clemence d'Estat, lors qu'il iuge que le  
 pardõ est plus vtile que le chastimét. Auec toutes ces  
 belles qualitez, il a vne discretion laquelle surpasse  
 sã aage & la creance des hommes. Lors qu'il voulut  
 prendre en main le tymon de son Estat, on ne l'en  
 veit point plus esmeu que de coustume, il n'en quit-  
 ta point ses exercices ordinaires, il eut la prudẽce de  
 telmoigner qu'il n'apprehendoit rien tãt que la co-  
 gnoissance des affaires, cet artifice empescha qu'on  
 n'entreprit & sur sa personne & sur la vie de ceux  
 qui l'auoient puissamment porté à ceste genereuse  
 resolution. Il a vn tel courage qu'il ne craint que  
 Dieu. S'il ne prouoque personne, c'est qu'il est mo-  
 deste, si on ne le prouoque point, c'est qu'on le  
 craint. Il n'y a gueres que son Altesse de Sauoye se  
 plaignit à luy par son Ambassadeur que Dom Pedre  
 n'auoit point satisfait au traicté d'Ast, qui portoit  
 que Dom Pedre defarmeroit pour le Roy d'Espagne  
 incontinent apres que le Duc de Sauoye luy auroit  
 osté la ialousie de ses armes. Le Roy qui estoit ga-  
 rand de l'execution du traicté, parla en ces propres  
 termes au Duc de Mõteleon Ambassadeur en Frãce  
 pour le Roy d'Espagne. *L'opinion qu'on a dõnce au Roy  
 d'Espagne vostre maistre, que ie ne puis sortir de mon  
 Royaume sans le laisser plein de troubles & diuisions, est  
 cause des longueurs qu'apporte Dom Pedre vostre beau-  
 frere à contenter mon cousin le Duc de Sauoye, mais ie veux  
 qu'il sçache que quand mon Estat deuroit estre mis à feu &  
 à sang en mon absence, il n'y a rien qui me puisse empescher  
 de passer les Monts on personne, afin de contraindre Dom  
 Pedre par mes armes à me tenir la parole qu'il m'a donnee,  
 & pour effectuer de ma part la promesse que j'ay faicte au  
 Duc de Sauoye.* Le Roy est parfaictement bon voisin,

mais dangereux ennemy, quiconque l'aura sur les bras sera chargé d'un pesant fardeau. Il n'est memoire de Prince qui soit né avec tant d'excellentes parties que luy, le ne remarque rien que de grand en toutes ses actions. Ses diuertissemens mesmes sont tous Royaux & tous serieux. Il s'exerce tantost à la fortification: préd le plan d'une place, choisit le terrain, fait entasser gazon sur gazons, ordonne des bastions, des boulevarts, il prend la peine de pointer luy-mesme le canon, voit l'une apres l'autre toutes les pieces du cabinet des armes, & s'exerce à l'art militaire par forme de passetemps, en attendant qu'il le pratique à bon escient, imitant ce grand Capitaine de nostre siecle, le Prince Maurice, qui pour s'en rafraichir perpetuellement la memoire durant la Tréue, ne desdaigne point de rager en bataille sur sa table, de petites figures faictes comme des Escheqs. Le Roy a une compagnie de ieunes Suisses qu'il a tellement instruits en la discipline de la milice, qu'ils n'ignorent rien du deuoir del'Infanterie. L'esprit & le corps de ce Prince sont tousiours en action, Il a iuré une guerre perpetuelle à l'oisiueté, comme à la mere de tous vices. Il fait auourd'huy voler l'Oiseau, vous luy voirrez demain courre le Cerf dans les routes d'une forest: Cette façon de viure l'a rendu tellement robuste qu'il est infatigable au travail. Il ne craint ny pluye, ny vent, ny Soleil. Au reste Dieu a logé toutes ses vertus dans un corps de belle taille, agreable, sain & dispos. Avec toutes ces qualitez il est heureux: les succez de ses affaires sont si conformes à ses desirs, qu'il semble que souhaitter & obtenir luy soit une mesme chose. Iamais autre Prince que luy n'eut la gloire d'estre des



l'aage de quinze ans, Arbitre de la Chrestienté. Apres auoir touché de qui est de sa personne, ie viens au gouuernement de l'Estat.

5. Vn des premiers signes de la benediction d'un Royaume, est quand le Prince a la vertu de docilité, & est assisté de personnes recommandables pour leur prudence, & pour leur integrité. Car le repos qui se voit dans les Prouinces, voire iusques aux moindres familles, qu'est-ce autre chose qu'un effect des bons aduis qu'on luy donne? C'est dequoy nous auons vn grand suiet de louer Dieu, les premieres places du Conseil estans remplies de personnes qui sont de longue main contumees dans les affaires, & qui ont esté employees par le feu Roy à des grandes & importantes negotiations tant dans le Royaume qu'aux pays estrangers, Mais bien qu'il semble qu'une Monarchie ne se puisse mal porter quand elle a des Ministres de ce merite; ie ne scaurois nier toutesfois, qu'il ny ait encor beaucoup à desirer en la santé de cet Estat. C'est vn corps indisposé de longue main: sa guerison n'est pas vn ouurage d'une iournee. La negligence des Princes qui ont regné a laissé au Roy vne grande matiere de sueurs & de traualx. Comparons doncques la France, non à ces Republicques imaginaires, dont la forme se doit plustost desirer qu'esperer, mais à ce qu'elle estoit lors que toute couuerte de playes & toute abatuë de douleur, elle se vint ietter entre les bras du Restaurateur de sa liberté. Côme les calmes sont plus agreables apres les tempestes, ainsi semble-t'il que les miseres passées accroissent les contentemens des felicitez presentes. Le Royaume estoit plein de guerres ciuiles, le Roy nous a donné la paix  
les

les vertus estoient punies, elles sont maintenant recompensees: les loix n'auoient aucune vigueur, il les a remises en autorité: les principaux du Conseil estoient bannis, & il les a rappelez avec tant d'honneur, que ie ne puis dire lequel a esté plus glorieux pour eux, où le iour de leur exil, ou celuy de leur reſtablissement. Que si les grandes despenſes qu'il a fallu faire n'ont peu permettre au Roy de ſoulager autant ſes peuples qu'il le deſiroit: Sa Maieſté en eſt veritablement la plus faſchee: elle n'a ſoin qui luy touche ſi viuement l'Âme que celuy-là: & afin de leur en rendre des teſmoignages particuliers, elle a reſolu de les deſcharger d'une infinité de commiſſions & d'offices dont il ſont plus travaillez que des leuees ordinaires: L'Edict qui en porte la reuocation eſt entre les mains du Parlement, pour y eſtre veriſié. Nous verrons auſſi par meſme moyen les belles Ordonnances qu'elle a faiſte pour la reformation des trois Ordres de ſon Royaume. Mais, qu'il me faſche, mon cher Palemandre, de conſiderer vne partie de ceux de la Religion pretenduë, comme vn membre deſtaché du corps entier de l'Eſtat!

6. La ſuite de mon diſcours requiert qu'apres vous auoir moſtré qu'on ne peut prendre aucun pretexte de rebellion ny ſur la perſonne du Roy, ny ſur l'adminiſtration des affaires, ie vous face voir le tort qu'ont ceux de la Religion de ſe plaindre qu'on les perſecute; C'eſt le langage qu'ils tiennent quand on ne leur accorde pas tout ce qu'ils demandent. C'eſte calomnie m'oblige à vous repreſenter ſommairement les biens-faits qu'ils reçoient tous les iours de ſa Maieſté, & l'ingratitude de quelques particu-

liers : mais deuant que d'entrer plus auant en ceste matiere, ie proteste que ie n'ay dessein quelconque de taxer le corps de la Religion : Je ne veux parler que de certains factieux, gens de telle humeur, qu'ils ne peuuent faire la guerre ny souffrir la paix. Ils sont la principale cause de tous les malheurs qui sont arriuez à la France depuis le deceds du feu Roy. A peine la mort luy auoit fermé les yeux qu'ils sollicitèrent les Princes Catholiques de se ietter dans leur faction. En suite de cela fut tenuë cette Assemblée de Saumur, que tous les gens de bien condamnerent comme vn attétat contre l'authorité Royale. Celuy qui fut vn des principaux ressorts de ces mouuements, n'estant pas encore content que l'amitié du feu Roy l'eust aduancé à l'vn des premiers honneurs de ceste Couronne, s'imagina qu'il ne restoit autre moyen de s'agrandir que par la ruine de ce Royaume. Il employa tous ses cinq sens de nature pour porter vn Prince à prendre les armes que ces mauuais conseils ont perdu. Et comme Alexandre voulant encourager les nations dont son Camp estoit composé, representoit à chacun les obiects dont elle pouuoit estre esmeuë: Il proposoit aux Macedoniens l'honneur des victoires, aux Tranes l'vtilité du butin: Ainsi cest esprit à qui la nature ce semble auoir donné de bonnes qualitez que pour les employer contre sa patrie, remist deuant les yeux de ce Prince tout ce qu'il creut estre capable de chatoüiller son naturel & d'irriter son mescontentement. Il luy remonstra, qu'il seroit comme maistre del'Estat, s'il se faisoit paroistre homme de courage: qu'il disposeroit des finances, qu'il mettroit des creatures de sa main dans les charges & dās les gou-



uernemens: sinõ, il auroit ce desplaisir de voir toute l'autorité du Royaume entre les mains de ses ennemis: Qu'il n'estoit plus temps de prendre des resolutions timides: qu'ayant accusé le regne present, il ne deuoit plus auoir recours qu'aux conseils hardis; qu'il ne pouuoit prendre son temps plus à propos que pendant que l'administration estoit odieuse, & la puissance Royale mal asseuree: Que toute la France luy tendoit les bras comme à l'vnique protecteur de sa liberté: il adiousta à ces persuasions les ressentimens des iniures, le mespris qu'on faisoit de luy, & qu'il ne pouuoit trouuer de seurété dans la paix: Que les Huguenots & les Catholiques l'assisteroient; que la pluspart des Princes le suiuroient partout, que l'autre ne luy nuiroit point; bref il luy representa tout ce que l'ábition peut esperer, & rien de ce que la prudence doit craindre. Les Mathematiciens, dont le pernecieux abus sera tousiours defendu en France, & n'en sera iamais banny, adiousterent tous les mensonges de leur art à la vanité de ces esperances: les mescontens viennent incontinent aux manifestes: font tout ce qu'ils peuvent pour interesser le particulier & le general. Cependant on proposa diuers moyens au Conseil du Roy pour remedier à la faction qui s'estoit formee: les vns estoient d'auis qu'on suiuiſt la voye de la douceur: ils remõstrerent qu'avec vne patience de deux mois on verroit reuenir les Princes à leur deuoir: qu'il falloit craindre d'irriter le mal par des remedes rigoureux: que ceux de la Religion pretendue ne manqueroient point à se souleuer si le Roy mettoit vne armee sur pied: qu'il n'estoit pas à propos qu'il allast en persõne cõtre les Princes: qu'il ne se deuoit

point esloigner de la ville Capitale: que demeurant dans Paris il dissiperoit toutes les factions qui s'y estoient faictes contre son seruice: Que la presence des grands Roys se deuoit tousiours reseruer pour les extremes necessitez: car quelle esperance d'ailleurs s'il arriuoit que les rebelles ne deuinsent point plus sages pour voir le Roy en propre personne? Ceux qui estoient portez à d'autres cōseils, disoient au cōtraire qu'il falloit faire sentir aux mescontents ce que peut la presence d'un grand Prince: qu'ils viendroient apporter leurs armes aux pieds de sa Majesté, aussitost qu'ils la verroient: qu'il y auoit de la honte à leur accorder ce qu'ils demandoient, & point de peril à le refuser, que la patience du Roy en estoit venue iusques à l'excès, que celuy qui souffre vne iniure en attire vne autre: qu'il falloit charger les ennemis pendant qu'ils estoient en desordre & en petit nombre, qu'on deuoit craindre que leurs troupes ne se grossissent: que le Roy auoit assez de forces pour les combattre sans faire de nouuelles leuees: qu'il ne faut rien mespriser en son ennemy: En fin les raisons de part & d'autre bien considerees on profera la douceur, à la sèuerité: Ceste resolution rimide ne fut prise que pour la crainte qu'on auoit des menées que faisoient ouuertement deux ou trois principaux de la Religion pretendue. Mais il demeure pour constant que le seul Regiment des Gardes n'estoit que trop fort pour tailler leurs forces en pieces. Il se fit doncques vn traité à sainte Menenon: mais les affaires ne demeurerent pas long temps en cet estat: l'année ensuyuante nous eumes la guerre pour la seule crainte que nous auions eue de l'auoir: la factiō se renouuella plus fort qu'au parauant: ces mesmes esprits turbulents essayèrent

de donner ombrage du mariage du Roy à tout le corps de la Religion, se ioignirent aux Princes, & leur mirent en main le flambeau dont ils bruslerent leur patrie. La compassion qu'eut le Roy de voir les miseres ou la guerre ciuile auoit reduit la plupart de ses Prouinces, le fit resoudre à pardonner vne reuolte qui a cousté plus de trente-six millions de liures à la France. La paix se fait à Loudun: les Princes reuiennent à Paris: les mesmes factieux recommencent leurs menées, les continuent encores à present, & s'efforcent de persuader generalémēt à tous ceux de la Religion, que ce regne est pour eux vn regne de calamitez & de persecutions. Le Roy tolere leurs cercles, entretient leurs Colleges, paye leurs Ministres & leurs Deputez: Il leur donne des pensions sur vn Estat particulier: leur continuē le priuilege des Châbres my-parties: les admet presque indifferemment à toutes les charges & dignitez de son Royaume, seroient-ils bien si iniustes que de se plaindre & de murmurer? Non, mon cher Polemandre, ie ne le croy pas: & quand quelques particuliers d'entre-eux n'auroient aucune recognoissance du fauorable traictement que le Roy leur fait, à quel propos voudroient-ils faire les mauuais: Croyēt ils qu'on ignore les foibleesses de leur partie. C'est ce qui m'oblige à vous en faire la description, afin que ie vous face recognoistre que le Roy y a beaucoup plus de bons seruiteurs que vous ne croyez.

Les signes des grandes & puissantes factions se cognoissent lors que tous les adherans sont tellement vnis les vns aux autres, que comme en ceste grande reuolte des legions d'Allemagne contre Tybere ils ne se proposent qu'une mesme fin, ne



suyuent qu'un mesme moyen pour y paruenir, se  
 courroucent & s'appaisent, se taisent & parlent en  
 mesme temps, avec vn tel ordre qu'ils semblent  
 auoir vn Chef encor qu'ils n'en ayent point. Vous  
 ne sçauriez trouuer aucune marque de ce grand con-  
 sentement dans le corps de la Religion: Ils se ioi-  
 gnent bien les vns aux autres quand il faut faire vne  
 requeste au Roy, mais s'il en falloit venir aux armes,  
 il n'y auroit plus d'vniõ entre-eux. Ils sont diuisez  
 en deux choses principales, à sçauoir en la doctrine,  
 d'autant qu'ils n'ont pas tous mesme creance: Ils  
 sont diuisez en intentions, à raison qu'ils n'ont pas  
 tous vn mesme dessein. La diuision de doctrine est  
 considerable d'Eglise contre Eglise, comme on le  
 peut voir par les disputes passees entre les Ministres  
 de Sedan & de Charenton. De particulier à parti-  
 culier vous trouuerez entre-eux autant d'opinions  
 que de personnes. Le point duquel nous nous  
 imaginions qu'ils sont plus d'accord, est le plus con-  
 trouersé, qui est le deuoir des peuples enuers les  
 Souuerains. La pluspart d'eux a la creance de l'Egli-  
 se Catholique, & croit comme article de foy, qu'il  
 n'est point permis aux subiects de prendre les ar-  
 mes contre leurs Roys pour quelque cause ou pre-  
 texte que ce soit: aussi n'ont-ils tenu assemblee où  
 il n'y ait eu de grands contrastes, quand il s'y est  
 fait quelque proposition contre le deuoir de l'o-  
 beissance. En matiere de party il faut que tous ceux  
 qui y trempent, ayent vne bonne impression de la  
 cause pour laquelle ils prennent les armes. Il n'y a  
 rien qui rende les hommes si courageux, que quand  
 ils croyent que la iustice est de leur costé, & que  
 Dieu les fauorise, s'ils n'ont ceste opinion il leur

demeure tousiours en l'ame vn certain remords qui les rend timides lors qu'il faut estre hardis. Vne des principales raisons des grandes conquestes des Romains, fut qu'ils croyent que la faueur des Dieux estoit pour eux: cette forte impression ne les rendoit pas seulement plus audacieux à faire la guerre, leurs ennemis mesmes en estoient plus craintifs à leur resister. C'est pourquoy les grands Capitaines, ne donnoient gueres bataille auparauant que d'auoir fait voir quelque bon presage aux soldats. Les Princes Chrestiens ont en cela vne grande prerogatiue: La loy de la Religion attache les subiects à l'obeissance du Prince par des liens si estroits, qu'elle les oblige à souffrir toute sorte de persecutions sans qu'il leur soit permis de murmurer. Et certes nous sommes infiniment redevables à la Prouidence Diuine, de ce qu'elle a si puissamment estably les Monarchies, que dans tous les liures sacrez il ne se trouue ny parole, ny exemple dont les ennemis des puissances souueraines se puissent seruir pour autoriser leurs rebellions. Car tout ce recit qui fut fait des droicts de la Royauté en la presence du peuple, lors qu'il esleut le premier Roy, Qu'est-ce autre chose que l'image de ceste autorité absoluë qui ne recognoist que Dieu pour Superieur? qu'on lise l'Ancien Testament, qu'on voye le Nouueau, le commandement d'obeyr aux Roys, encores qu'ils soient rebelles, y est escrit en des caracteres que les auengles peuuent lire. La plus grande & la meilleure partie de ceux de la Religion pretenduë demeurera constamment en son deuoir, scachant que qui resiste à la puissance des Princes, resiste à l'Ordonnance de Dieu. Il n'y a pas seulement en-

tre eux diuision de doctrine? Il y a grande diuersité d'intentions. Les Ministres ne taschent que d'vsurper vn Empire absolu sur les consciences, Ils veulent inuuant la resolution du Synode de Priuas, que les particuliers soufmettent leurs sentimens au iugement des Eglises. Assurez-vous, Polemandre, qu'il n'y a Ministre qui ne voulust estre Pape, & auoir d'aussi bons benefices qu'en a l'Eglise Romaine, à condition de faire des prieres pour les Morts. Il y a des grands qui ne s'attachent à l'heresie que parce qu'ils croyent y estre plus considerables que dans l'Eglise. Ceux-là ne sont point incogneus entre-eux. Il y en a d'autres, & en bon nombre, qui suivent le Caluinisme par conscience, il n'en faut rien craindre de mal, car ils ne desirerent que la paix. La racaille d'Vzès & de Nysses animee par les presches seditieux, meine plus de bruit que ne fait tout le reste ensemble, & comme elle aspire tant qu'elle peut à l'Estat populaire, ainsi a-t-elle pour suspects tous les grands de ce party. La pluspart de ceux de la Religion sont gens de bien: Ils ont dequoy perdre, & n'ignorent point les desseins des principaux d'entre eux. Ils iouissent de leurs facultez sous le benefice des Edicts, aiment mieux auoir vn maistre que plusieurs & n'en veulent point d'autre que le Roy. Ceux de la Rochelle ont vn autre but, ils pretendent que leurs bastions doiuent commander à la Xaintonge, au Poictou, & aux autres Prouinces circonuoisines, comme la ville de Venise commande au reste de la Seigneurie. Considérez avec toutes ces diuisions l'affiete des places qu'ils tiennent, elles sont tellement separees par les villes Catholiques, qu'elles ne se peuent secourir. D'attendre de l'assistance de  
dehors



dehors, c'est chose hors d'apparée : Le Roy d'Angleterre ne desire rien plus que de viure en bonne intelligence avecques nous : d'ailleurs il est trop interessé en la cause des Roys, pour favoriser les rebellions des subjects. L'Allemagne est assez empeschée en ses propres diuisions, sans se mesler de celles d'autrui. Les Estats de Hollande n'ont gueres moins d'affaire chez eux. Il n'y a point d'esperance du costé de l'Espagne & de l'Italie. Outre tous ces tesmoignages de foiblesse, ils sôt en petit nombre & n'ont point de Chef. Ce qui rendit les Caluinistes redoutables en la naissance de l'heresie, c'est qu'un premier Prince du sang marchoit à la teste d'une armée, & que la persecution les fit tomber en un desespoir qui ne redoutoit nullement la mort. Ils combattoient lors pour la defense de leurs biens, de leur religion, & de leur vie; Ils ont tout cela maintenant & beaucoup plus : quel subject doncques les scauroit plus émouvoir ? ou quel pretexte scauroient-ils prendre pour se reuolter ? Ils n'ont gueres dans leur party que deux hommes qui scahent parfaitement le mestier des armes : tous deux sont hors d'aage de fournir aux fatigues de la guerre, l'un ne fera rien mal à propos, parce qu'il est tres-prudent, l'autre parce qu'il est fin, & qu'il scait bien qu'il n'y a que des coups à gagner contre le Roy. En tout le Royaume ie ne voy point d'hommes aux actions duquel on puisse recognoistre les marques d'un esprit qui sèble aspirer à la qualité de Chef de part. Ce qui fut cause que tout le monde se passionna pour le party de la ligue, c'est qu'on y voyoit un Chef qui n'espargnoit ny liberalitez, ny caresses pour gaigner des cœurs. Il n'y auoit rien de si seruile

qu'il ne fist pour commander. Il auoit la vigilance, la dissimulation, & la courtoisie : parties non moins pernicieuses que les vices : quand les grands courages les font seruir d'instruments à la ruine de leur patrie. Ce qui luy aydoit encor puissamment, estoit le support de la Cour de Rome, la grandeur d'un ennemy dont l'inclination seuerie a tousiours esté plus portee à se faire craindre qu'à se faire aimer : le scandale du Cabinet & les vices du Prince luy seruient aussi avec vne infinité d'autres circonstances lesquelles n'ont rien de commun avec les considerations du regne present. Ceux de la Religion considerez comme vn corps estant en petit nombre, considerez comme diuisez de doctrine & d'intention estant encores en plus petit nombre, & n'ayant aucun pretexte pour prendre les armes, aucunes forces pour faire la guerre, aucun Chef pour leur commander, quel sujet auez-vous de vous donner les allarmes que vous en prenez ? Le vous dis bien d'auantage, c'est que quand ils seroient résolus à faire election d'un Chef, ie ne sçays'ils pourroient trouuer quelque vn qui le voulust estre. Ce n'est pas vne petite resolution à prendre, quand il faut tirer l'espee contre son Roy. Iamais homme ne l'a fait qu'il ne s'en soit repenty, & n'est arriué que malheur aux Grands qui se sont meslez des affaires des huguenots. Avec cela ceste maniere de gens est si fascheuse à gouverner, qu'il n'y a condition plus miserable qu'est celle des Princes qui luy commander. Elle se desfie de ses Chefs quand ils sont heureux, & les mesprise quand la fortune leur est contraire. Elle reiette sur eux tout le blasme des desfaites, & veut auoir seul l'honneur des victoires. L'Ad-

miral de Chastillon estoit si lassé de leur caprices, qu'il les eust quittez long tēps deuant quē de mourir, s'il eust creu pouuoir trouuer seureté dans le seruice du Roy. Apres qu'il eut remué le Ciel & la terre contre son Maistre, en fin il reuint au Louure, car quand on a bien fait le fascheux il faut tousiours reuenir au Cabinet, & passer au trauers des gardes: sur ces entrefaites il est blessé d'un coup d'harquebuz: ses amis s'imaginant qu'il n'auoit point esté tiré fortuitement, luy conseillerent de se retirer: luy ne voulant point croire leur aduis, leur dit qu'il aymoient mieux mourir que de commander plus long temps à des gens de ceste humeur. Puis que ie vous ay monstré que ceux de la Religion n'ont ny pre-texte ny forces pour faire la guerre, il faut que ie vous face voir que le corps n'est nullement intéressé en l'affaire de Bearn: Ie me trompe, ou la seule narration du fait vous le fera cognoistre si clairement, que ien'auray besoin de le fortifier d'aucunes raisōs.

En l'an 1569. la Reyne Ieanne d'Albret, Mere du feu Roy, ayant exterminé du Bearn la Religion Catholique, tous les gens d'Eglise & plusieurs des principaux Catholiques furent noyez, bannis & massacrez, & tous leurs biens tant seculiers que reguliers, mis en la main de la mesme Reyne par le Comte de Mongommery son Lieutenant general au mesme pays. L'année suiuiante elle conuoqua vne Assemblée qu'elle appella du nom d'Estats, combien que cela ne püst estre, puisque l'ordre Ecclesiastique qui est le premier n'y fust point appelé ny pareillement les Catholiques de la Noblesse & du tiers Estat. La Reyne fit confirmer par ceste Assemblée tout ce qu'auoit fait le Comte de Mon-



gommery. Les Ministres qui preoccupoient l'esprit de ceste Princesse, luy firent faire certaines Ordonnances, comme celles de Geneue, qui furent aussi ratifiées par la mesme conuocation, bien que pres- que entierement contraires aux Loix fondamen- tales du pays. C'est ce qu'ils appellent les Ordon- nances de la Reyne Ieanne, & loix fondamentales, quoy qu'elles ne soient point nées avec l'Estat, mais faiçtes depuis cinquante ans. La Reyne estant faisie de ces biens, assigna sur les deniers qui en prouien- droient les pensios des Ministres & autres charges. Les affaires demeurerēt en ce poinct iusques en l'an 1599. que le feu Roy reſtablit la Religion Catho- lique en certains lieux de Bearn, nomma deux E- uesques pour cest effect, & leur assigna pension suffisante sur le Domaine de Nauarre, pour s'en- tretenir selon leurs dignitez; avec promesse de re- mettre bien tost les Ecclesiastiques en possession de leur temporel. Depuis 99. iusques en 608. il ne s'est passé année qu'il n'ayt restitué quelque chose à l'Eglise. En fin il prit vne ferme resolution de met- tre la derniere main à cest ouurage, & commença par l'entiere main leuée de tout ce qui appartenoit dans le mesme pays aux Euesques d'Aix, d'Aire, & plusieurs autres Prelats. Les lettres patentes furent verifiées au Parlement de Pau, & executées sans contredit. Cependant le Roy meurt sur ces entre- faiçtes; la Reyne Mere confirma durant sa Regéce toutes les promesses que le feu Roy auoit faiçtes aux Catholiques, & en remit l'accomplissement à la majorité du Roy. Les Euesques de Bearn, & au- tres Catholiques deputez du pays, se rendirent à a Cour au mesme temps, pour en pourſuiure l'exe.

cution. Les trois Ordres des Estats generaux du Royaume conuoquez à Paris en l'an 1615. deputerent vers sa Majesté, pour luy faire tres-humbles remonstrances sur l'importance de ceste affaire. L'Assemblée du Clergé tenuë en 1617. en fit autant. En fin le Roy se sentant pressé, par sa conscience, & par les saintes intentions du feu Roy son pere, prononça de sa propre bouche vn Arrest, par lequel il ordonna. *Que les Ecclesiastiques auroient main-levée de leurs biens, & que l'exercice de la Religion Catholique seroit restably par tout le Bearn;* & neantmoins par vn excez de bonté, il accorda par le mesme Arrest aux Ministres, Professeurs, Garnison, Cours Souueraines de Bearn, & à tous ceux qui estoient payez de leurs gages & appointement sur les deniers provenans des reuenus Ecclesiastiques, que d'oresnavant ils seroient payez de pareille somme par les mains du Thresorier General de la Maison de Navarre, duquel ils la receuoient auparavant, & afin qu'ils perceussent plus commodément les mesmes appointemens, affecta à leur payement les deniers tant ordinaires qu'extraordinaires du Domaine de Bearn, Comté d'Armagnac, & parties Casuelles, des Comtez, Vicomtez, & Baronnies de Foix, Bigorre, Narfan, Tursan, & Gauardan, Nebozan, Lautrec, Capiteux, Aspect, Aure, Nestes, Barousse, & Maignoac, ensemble les donations des mesmes terres, sans qu'à l'aduenir il en puisse estre fait aucun diuertissement pour quelque cause que ce soit, avec pareil pouuoir à ceux de la Religion pretenduë, d'vser de semblables contraintes sur les Receueurs des mesmes terres qu'ils auoient autresfois contre ceux qui aupara-

nant touchoient le reuenu du temporel des Ecclesiastiques. Ils disent qu'on ne les a point ouy ; mais ie ne sçay comme ils peuuent auoir le front de maintenir ceste calomnie. Messieurs de Chasteau-neuf, de Lomenie, de Pontcarré, de Boissise, de Rouffy, Allygre, & le feu President de Thou & du Refuge, furent Commissaires en ceste cause, & receurent toutes les defences que produisit le sieur de Lescun Deputé des Eglises de Bearn. Le dispositif de l'Arrest fait encore foy comme ils les rapporterent au Conseil. Qui plus est les Ministres d'Isserote pere & fils, Deputez avec le sieur de Benzin pout se joindre au sieur de Lescun, furent amplement ouïs en tout ce qu'ils voulurent alleguer. Les Ministres dont les pensions estoient assignées sur les biens Ecclesiastiques, se plaignent qu'on diuertit vn fonds sur lequel ils estoient payez, mais ils sont desinteressez par le remplacement que le Roy leur donne: attendu que le Domaine de Bearn, d'Armagnac, des Comtez, Vicomtez & Baronnies qui leur a affectées, est plus que suffisant pour acquerir les charges qui se prenoient sur les biens Ecclesiastiques, & que c'est par les mains du mesme Thresorier qui les payoit auparauant: dequoy le Roy leur a donné toutes les seuretez que le sieur du Plessis Mornay, en a requises de sa Majesté. Il y a vne autre espece de gens qui se cabrent, à sçauoir ceux desquels les Euesques, Chapitres & autres Communantez retirent le temporel Ecclesiastique que la Royne Ieanne auoit engagé. Mais quel tort leur fait-on, puis que ce n'est qu'en payant aux detenteurs ; les sommes principales avec les reparations & ameliorations: L'Edict qu'en fit le feu Roy en 99. fut ve-



rifié purement & simplement au Parlement de Paris  
 plusieurs de la Religion, desquels les Euesques de  
 l'Escar & d'Oleron, ont racheté des terres, ne s'en  
 sont point plaincts: A quel propos ceux-cy font-  
 ils maintenant difficulté d'y obeïr? Ils alleguent  
 pour toutes raisons qu'il y a prescription, parce  
 qu'ils en ont iouy plus de cinquante ans: Mais si  
 c'est Domaine, à cause de la réiunion qu'en fit la  
 Reyne Ieanne, il est inalienable, & par consequent  
 le Roy, comme heritier de son Ayeulle est en faculté  
 de rachapt perpetuel: si c'est patrimoine de l'E-  
 glise, il ne peut auoir esté confisqué. De mettre en  
 auant les incommoditez de quelques particuliers,  
 contre la consideration du bien public, c'est chose  
 si impertinente que ie n'y daignerois respondre.  
 Voila, mon cher Polemandre, toutes les circon-  
 stances du fait de Bearn. Comme le corps de la Re-  
 ligion n'a point d'interest avec les familles ausquel-  
 les ceste main-leuee preiudicie, aussi ne prend-il au-  
 cune part à leurs mescontentemens. Quoy qu'il y  
 ait le Roy sera obey. Tout ce qu'il leur donne de la  
 hardieffe est l'imagination qu'ils ont de nos crain-  
 tes. L'autorité de sa Majesté n'est point si peu res-  
 pectee en ce pays-là qu'on le croit. Il n'y a rien de si  
 esloigné dans le Royaume qui nesoit à la porte de  
 ses foudres. Les gens de bien reuerent la puissance  
 Royale, parce qu'ils l'ayment: & les meschans, par-  
 ce qu'il la craignent. De ces deux diuerses passions  
 naistra en fin vne mesme obeïssance, le corps ne  
 s'en remuëra nullement, parce que c'est son bien  
 que deviure dans le seruice du Roy: s'il n'auoit ce  
 maistre il faudroit qu'il en eust d'autres. Dormez  
 doncques seurement de ce costé-là, & croyez que

toutes choses ne tendent qu'à la conseruation de la paix. Mais les sentimens de l'amitié fraternelle ne me permettent plus que ie vous appelle Polemandre. Je vous coniure, mon cher frere, de prendre courage en vostre accident. Vous n'estes point seul à qui vne bleſſeure receuë pour le seruice du Roy, ait fait garder le liët pres de deux ans. Si vous ne vous consolez par la gloire, au moins faictes-le par ezemple. Plus les malheurs sont communs, & plus ils sont supportables. Nous auons de l'obligation à la fortune, de ce qu'elle vous a conserué les bras: ce que vous auez perdu, n'est point estimable, à comparaison de ce que vous auez acquis. Si Dieu vous fait la grace de reuenir à la Cour, vous y verrez deux choses qui ne se voyent gueres, vn conseil de vicillard pres d'un ieune Roy, & la faueur avecques la modestie; Alors vous m'aduouerez que ce regnë est le plus iuste & le plus heureux qui fut iamais.

F I N.